

新元史

第三五册

列傳第二十六

新元史卷之一百二十九

賜進士出身日講起居注官翰林院侍讀國史館纂修膠州柯劭忞撰

乞失里黑

巴歹
塔里察

抄兀兒

哈散納

紹古兒

忽都虎

鐵邁赤

虎都鐵木祿
塔海

拜延八都魯

紐兒傑

布智兒

俺木海

忒木台兒

抄兒

純只海

帖古迭兒
大達里

咬住

乞失里黑幹羅納兒氏與弟巴歹俱爲也客扯連牧馬也客扯連者合不勒罕之孫始附太祖後與阿勒壇忽察兒等間太祖於王罕潛謀來襲也客扯連至家與其

妻言之且曰今設有人往報帖木眞不識彼將何以賞之時巴歹適送馬乳至聞其語出告乞失里黑乞失里黑往偵之見也客扯連之子納都客延坐帳外磨礮自言曰汝自饒舌安能防人之口乞失里黑謂巴歹曰信矣二人卽乘夜告於太祖避於卯溫都兒山陰太祖滅王罕以王罕金撒帳金酒器并管酒局之人賜之太祖卽位乞失里黑巴歹並封千戶賜號答剌罕遇大宴喝盞乞失里黑從太祖征西域平西夏俱有功又從太宗伐金以病卒子塔里察從睿宗間道攻河南又從塔察兒破蔡州以功賜順德爲食邑孫囊家台從憲宗伐蜀

卒於軍中

抄兀兒沼列台氏事太祖爲麾下部曲太祖駐兵徹徹兒山哈刺赤散只兒朶魯班塔塔兒宏吉刺亦乞列思諸部會於堅河忽蘭也兒吉之地謀奉札木合爲局兒可汗潛師來襲有塔海哈者與抄兀兒爲婚媾抄兀兒往視之並轡而行塔海哈以鞭築其肋抄兀兒回顧塔海哈目之抄兀兒悟乃下馬佯臥塔海哈遂以諸部之謀告之曰事急矣汝將何往抄兀兒大驚卽馳還遇火魯刺人也速該言其事也速該曰我左右祇幼子及家人火力台耳因使火力台偕抄兀兒往且誓之曰汝至

彼惟見帖木眞夫婦及我婿哈撒兒則告之苟泄於他人必斷汝腰膂中道遇忽蘭八都哈喇蔑力吉台之游兵爲所執其人亦心附太祖贈以獺色馬而釋之旣又遇送髦車白帳於札木合者抄兀兒疾馳獲免見帝悉以所聞告之帝以兵迎戰於海刺兒阿帶亦兒渾之野札木合敗走宏吉刺部來降太祖賜抄兀兒以答刺罕之號卒子那眞事世祖爲也可扎魯花赤那眞卒子伴撒襲伴撒卒子火魯忽台襲致和元年執倒刺沙使者察罕不花并其金字圓牌獻於文宗賜金帶嘗奏言有犯法者治之當自貴人始窮乏不給者救之當自下始

如此則得衆心其言最切於時弊云

哈散納怯烈氏從太祖征王罕有功同飲巴渚泐納水
後管領阿兒渾軍從平西域下薛迷斯干諸城太宗時
仍命領阿兒渾軍并回回人匠三千戶駐於尋麻林尋
授平陽太原兩路達魯花赤兼管諸色人匠卒子捏古
伯從憲宗攻釣魚山有功卒

紹古兒麥里吉台氏太祖時同飲巴渚泐納水扈從親
征已而從破信安略地河西賜金虎符授洛磁等路都
達魯花赤復從破河南太宗命領濟南大名信安等處
軍馬憲宗元年卒子拜都襲拜都卒子忽都虎襲移睢

州從世祖渡江攻鄂州還鎮恩州中統三年從征李璿
有功尋命修邳州城率所部鎮淮南十一年從丞相伯
顏渡江有戰功又從參政董文炳攻沿海郡縣還鎮嘉
興行安撫司事十二年加昭勇大將軍職如故十四年
授嘉興路總管府達魯花赤尋擢鎮國上將軍黃州路
宣慰使尋罷黃州宣慰司復舊任十六年改授浙西道
宣慰使加招討使奉詔征占城以其國降表貢物入見
帝嘉之厚加賞賚二十四年從征交趾明年還師授邳
州萬戶府萬戶三十年卒

鐵邁赤合魯氏善騎射初事忽蘭皇后帳前爲捫馬官

從太祖定西夏又從皇子闊出行省鐵木答兒定河南
累有戰功憲宗伐宋遣元帥兀良哈台自雲南擣宋與
諸軍合時世祖方圍鄂州聞兀良哈台至長沙遣鐵邁
赤將勁卒千人鐵騎三千迎之兀良哈台得援始抵江
夏世祖卽位從討阿里不哥于昔木土之地至元七年
授蒙古諸萬戶府奧魯總管十九年卒子八人虎都鐵
木祿最顯

虎都鐵木祿字漢卿好讀書與士大夫遊其母姓劉氏
故人又稱之曰劉漢卿仁宗嘗謂左右曰虎都鐵木祿
字漢卿雖漢之名卿何以過之汝等以漢卿稱之宜矣

至元十一年從丞相伯顏伐宋既入臨安遣視宋宮室
護帑藏諭下明台等州又從平章奧魯赤入覲授忠顯
校尉總把再轉昭信校尉改奉訓大夫荆湖占城等處
行中書省理問官一日以軍事入奏世祖大悅曰虎都
鐵木祿辭簡意明令人樂於聽受昔以其兄阿里警敏
令侍左右斯人顧不勝耶勅都護脫因納志之平章政
事程鵬飛建議征日本奏爲征東省郎中帝顧脫因納
曰鵬飛南士也猶知其能姑聽之候還朕當擢用征東
省罷徵虎都鐵木祿還丞相阿里海牙遣郎中岳洛也
奴奏留之二十三年從皇子鎮南王征交趾北還時桑

哥方擅威福遂告歸二十八年哈刺合孫拜湖廣行省平章政事詢舊人知方面之務者眾薦虎都鐵木祿遣使驛致武昌後奏事京師稱旨擢給事中臺臣奏爲廣西海北道廉訪司副使陞辭帝留之舊職三十年湖廣行省平章劉國傑奏伐交趾造戰船五百於廣東帝曰此重事也須才幹者濟之遂以虎都鐵木祿督其事勅曰汝還當顯汝於眾未幾帝崩改福建行省郎中累遷中順大夫湖南宣慰司副使峒酋岑雄叛奉詔諭之雄爲帖服改河南行省郎中擢同僉樞密院事拜禮部尙書大臣奏覈實江南民田虎都鐵木祿奉詔使江西以

田額舊定重擾民不便置不問止奏茶漕置局十七所以七品印章勅授局官五十一員增中統課緡五十萬轉兵部尙書階正議大夫未幾出爲荆湖北道宣慰使進中議大夫己命復留之延祐三年浙東商舶以貿易激變遣虎都鐵木祿宣慰閩浙後卒於官從子塔海

塔海少隸土土哈部下充哈刺赤至元二十四年扈駕征乃顏二十六年入覲帝命充寶兒赤扈駕至和林賜只孫服大德四年授中書直省舍人遷中書客省副使武宗卽位賜中統鈔五百錠尋進和林行省理問所官改通政院僉事歷和甯路總管改汴梁路先是朝廷令

民自實田有司繩以峻法多虛報以塞命其後差稅無所出民多逃竄塔海言其弊於朝由是省虛糧二十二萬石後改廬州總管有飛蝗北來民患之塔海禱於天蝗自引去亦有墮水死者人皆以爲異歲饑民乏食開倉減直糶之全活甚衆天歷元年樞密院奏以塔海守潼關及河中府賜白金鈔幣宣授僉書樞密院事未幾西軍犯南陽塔海督諸衛兵禦之賜三珠虎符進大都督階資善大夫卒

拜延八都魯札剌台氏幼事太祖賜名八都魯太宗七年命領所部兵與塔海甘卜出秦鞏入蜀有功憲宗三

年又與總帥汪德臣立利州城四年破宋軍鹿角寨奪其軍資七年從都元帥紐鄰城成都及圍雲頂山宋將姚統制降帝親征紐鄰進兵涉馬湖江留拜延八都魯鎮成都降屬縣諸城得其民悉撫定之賜黃金五十兩衣九襲諸王哈丹乃歡脫脫等征大理還命拜延八都魯率兵迎之道過新津寨與宋潘都統遇一戰敗之中統二年元帥紐鄰上其功授蒙古奧魯官子外貌台孫兀渾察至元六年拜延八都魯告老兀渾察代領其軍從行省也速答兒征建部有功十六年從大軍征幹端又有功賞銀五十兩二十一年諸王朮伯命兀渾察屯

乞失哈里之地以禦海都時敵軍衆兀渾察以勇士五十人拒之擒其將也班胡火者以獻王壯之以其功聞賜銀六百兩鈔四千五百貫授蒙古軍萬戶賜三珠虎符三十年卒次子襲授曲先塔林左副元帥尋卒弟塔海忽都襲進鎮國上將軍都元帥改授四川蒙古副都萬戶至治二年以疾退子孛羅帖木兒襲

紐兒傑脫脫里台氏身長八尺善騎射能造弓矢嘗道逢太祖騎士別那顏邀與俱見太祖視其所挾弓矢甚佳問誰造者對曰臣自造之適有野鳬翔於前射之獲其二并以二矢獻而退別那顏從之至所居見其子布

智兒別那顏奇之許以女妻布智兒父子遂俱事太祖
紐兒傑賜號拔都憲宗時卒

布智兒從征回回斡羅斯等國每臨敵必力戰嘗身中
數矢太祖親視之令人拔其矢流血悶仆幾絕太祖命
取一牛剖其腹納布智兒於牛腹浸熱血中移時遂甦
憲宗卽位以布智兒充燕京等處行尙書省事天下諸
路也可札魯忽赤印造寶鈔賜七寶金帶只孫十襲又
賜蔚州定安爲食邑布智兒性酷暴一日殺二十八人
內一人旣杖復追斬以試其刀爲世祖所切責世祖卽
位布智兒附阿里不哥有二心帝徙布智兒於中都使

孟速思監護以往未幾卒子四人長好禮事世祖備宿衛丞相伯顏伐宋奏好禮督水軍攻襄樊從渡江入臨安以功擢昭毅大將軍水軍翼萬戶府達魯花赤次別帖木兒吏部尙書次補兒答思雲南宣慰使次不蘭奚襲兄職爲水軍翼萬戶招討使鎮江陰移通州子完者不花遼陽省理問

唵木海八剌忽斛氏與父孛合出俱事太祖征伐有功帝嘗問攻城之策對曰攻城宜礮石力重而能及遠帝卽命唵木海爲礮手九年木華黎南伐帝諭之曰唵木海言攻城用礮甚善汝能任之何城不破賜金符授隨

路礮手達魯花赤俺木海選五百餘人教之後平諸國多賴其力太宗四年從圍南京憲宗二年特授虎符擢都元帥從宗王旭烈兀征木剌夷報達俱有功卒子忒木台兒

忒木台兒以戰功授金符襲礮手總管至元十年築正陽東西二城置礮二百與宋人戰却之十三年從丞相伯顏伐宋駐軍臨安之臯亭山同忙古歹等八人率甲士三百入宋宮取傳國寶宋太后請解兵延見內殿期明日出降至期果遣賈餘慶等奉璽寶至軍前以功授行省斷事官復令其子忽都答兒襲礮手總管十四年